

欲避殿減膳以答天譴也連源等又啓曰避殿減膳恐懼修省乃憂災之事也當時日官之見雖非偶然然文官時方測候待開霽更見而後為之何如傳曰如啓

史臣曰 上以彗星為災欲避殿減膳大臣議啓曰請俟更見而為之夫占驗之事付之日官日官之已奏極分明而乃曰云云豈以文具末節不足以答天怒故耶若連夜陰曠不得測候而減不復見則是終無避殿減膳之時而他日導君上忽天災之端抑或由此而始矣大臣之啓未可知也

○夜坤方艮方南方東方西方如火氣

六月庚午朔下諭于八道開城府審理冤獄俾無滯繫先是上欲疏放大臣止之故有是命

史臣曰刑獄者人之死生關焉士師聽斷一失其道則銜冤莫白而台災致異益亦多矣今者淫雨作沴星文示變雖不可指為某事之應安知犴牢之中冤枉之氣有以感傷天地之和而致然耶